

Friday, June 26, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



VEHICLE CHECK

Aizawl Traffic Police-ten nizan khan Aizawl khawpui chhungah dan bawhchhia a lirthei khalh an vai a, dan bawhchhia mi 58 an man.

Traffic Police-te hian nizan dar 9 leh tukin khawvar dawn thleng khan lirthei dap hna hi an thawk a. An man zinga 18-te chu kal phal loh zawnga tlan an ni a, helmet khum lo mi 15 an man bakah driving licence nei lova lirthei khalh 5, bike tihrinna vuah mi 3 an man bawk a. Rui chung a lirthei khalh mi 3 bakah dan bawhchhiatna chi hrang hrang – hlauhawm taka lirthei khalh, luh phal lohna kawnga lut, phal aia tam mi phur leh phal loh chi helmet khumte mi 14 an man tel bawk a ni.

Traffic Police-te chuan inthlahdah tak leh midang harsatna siamsak hreh hauh lova lirthei khalh ching an awm chu paw i an tih thu an sawi a. Aizawl khawpui a lo him theih na’n leh him leh thlamuang taka mipui-in kawngpui an hman theih na’n a tul anga lirthei khalhtu dan bawhchhiate endik hna hi kalpui zui zel an tum thu an sawi bawk a ni.



DRUGS DESTROYED

Nimin khan International Day Against Drug Abuse & Illicit Trafficking pualin Excise & Narcotics Department-in ruihhlo an man khawm Cheng vbch. 94 leh nuai 83 chuang hu an hal ral.

Excise & Narcotics Department-in ruihhlo an tihral hi Heroin Kg. 33 leh gram 495; Ganja Kg. 191 leh gram 52; Methamphetamine Kg. 192 leh gram 126; khuh damdawi Kg. 667; Alprazolam Kg. 3 leh gram 866; Nitrazepam Kg. 2 leh gram 317; Tramadol Kg. 1 leh gram 644; Lorazepam Gram 362; Tapentadol Gram 292; Etilozam Gram 80 leh Diazepam Gram 60 a ni.

Heng ruihhlo hi a vaiin cheng vbch. 94, nuai 83, sing 9, sang 3 leh 855 hu a ni a. Hemi kaihhnawihah hian thubuai 600 ziah luh niin, Court-in thubuai a chinfel tawh, tihral phalna a pek a ni a, heng ruihhlote hi Phunchawng-a Bethani Multipurpose Farm-ah Excise & Narcotics Secretary, Pu C. Lalruaia hovin an hal ral a ni.



DISASTER

Kum 5 kalta (kum 2021 leh 2025 inkar) chhung khan chhiatna hrang hrang avanga Mizoram chhunga thiltih chhiatte chu cheng veibelchhe 656 leh nuai 76 hu ni a chhut a ni.

Nimina Chief Minister Pu Lalduhoma,State Disaster Management Authority chairman ni bawk,hova CM Conference Hall-a thutkhawmah hemi chungchang hi sawiho a ni a. Mizoram a chhiatna hrang hrang avanga ei leh bar leh sum leh pai a nghawng dan leh sum holh zat chu cheng vaibelchhe 654 leh nuai 34 hu,a tling nia chhut a ni a. Thil tihchhiat leh hloh zawng zawng din tha leh tur hian cheng vaibelchhe 879 leh nuai 82 mamawh a ni dawn ni a chhut a ni. Kum 2021 - 2025 chhunga khuarel chhiatna avanga Mizoramin thil a hlohte chipchiara chhutna (PDNA) report-a a lan danin chhiatna thlentu lian zualte chu Cyclone Remal te, African Swine Fever (ASF) vawk pulhri lengte, ruah sur nasa leh leimin nasate bakah nikuma hmun thenkhata Sazu puangte a ni a. He inkhawm hi National Disaster Management Authority member Pi Rita Massal, chuan a rawn telpui a ni.

Inkhawmah hian thil dang bakah Mizoram State Disaster Management Plan 2026 leh district 11 te Disaster Management Plan te sawifiah a ni a. Mizoram sorkarin Project Management Unit for National Landslide Risk Mitigation Project te, National Earthquake Risk Mitigation Project leh Mitigation Scheme for Forest Fire Risk Management te chu din anih tawh thu tarlan a ni a. He PMU hi a taka hnathawk thei tura thuam chak dan tur chungchang sawiho a ni.

Rikrum thila chet chhuah thuai theihna atana ruahmanna Emergency Response Support System kalpui chhunzawm zelnaw tur te, kum 2024 - 25 chhunga district hrang hranga chhiatna thleng buaipui leh siamthat (recovery & reconstruction) sum ruahman atanga hnathawh tur thlan chhuah 178, a vaia cheng vaibelchhe 11 leh nuai 44 senna tur te, Search & Rescue hmanraw lei belhna tur te leh ASF vawk pulhri leng chu State Specific Disaster-a puan zui zel chungchangte pawh an sawi a. Heng bakah hian Disaster lama Mizoram mamawh hrang hrangte Pi Rita Missal hnenah hian an thlen bawk.



VC INN

Nimin chawhnu khan Rural Development & Administration Department (RD&AD) Minister Prof. Lalnilawma hovin Chite Vengah leh Mission Vengthlangah te VC Khualbuk sakna tur hmunhma enfiah a ni a. Minister hi All Mizoram Village Council Association (AMVCA) hruaitute leh LAD Official ten an tawiawm a ni.

Minister chuan hmun hla tak tak atanga Village Council hruaitute Aizawlah hna pawimawh thawka an lo kal changin thlenna tur hmun an nei lo chu fel lo a tih thu a sawi a. An harsatnate sukiang turin sawrkar chuan theih tawp chhuahpui a tum thu sawiin, VC Khualbuk chu puitlin theih a nih chuan thil hlu leh ro tling a nih ngei a rin thu a sawi bawk.

AMVCA hruaitute pawhin VC Khualbuk ngaihtuahpuitu, Minister leh Sawrkar hnathawkte chungah lawmthu an sawi a. A tul dan anga tanpui zel turin an ngen bawk a ni.

